

Permohonan, kemas kini maklumat dibuka

Putrajaya: Permohonan dan kemas kini maklumat Bantuan Rakyat 1Malaysia (BR1M) 2017 dibuka mulai semalam hingga 31 Disember ini.

Kementerian Kewangan dalam kenyataan semalam, berkata notis dan surat pemakluman lulus atau gagal permohonan BR1M 2017 akan diposkan kepada pemohon mulai minggu kedua Februari 2017.

"Bayaran BR1M akan mula dikreditkan ke akaun penerima secara berperingkat pada pertengahan Februari tahun depan.

"Kerajaan berhasrat pembayaran BR1M tahun 2017 dapat membantu meringankan beban kos sara hidup rakyat," katanya.

Kenyataan itu menyebut, permohonan dan kemas kini maklumat boleh dilakukan secara manual atau dalam talian.

"Pemohon perlu mengemukakan maklumat peribadi dengan lengkap dan perlu dinyatakan maklumat waris, maklumat akaun bank dan nombor telefon yang boleh dihubungi.

"Penerima BR1M 2016 (sedia ada) juga perlu mengemas kini maklumat. Permohonan yang tidak lengkap akan menyebabkan permohonan tidak dapat diproses atau gagal," katanya.

Borang BR1M 2017 boleh didapati secara percuma di mana-mana cawangan Lembaga Hasil Dalam Negeri (LHDN), Pusat Khidmat Hasil (PKH) LHDN dan Pusat Transformasi Bandar (UTC) LHDN.

"Pemohon juga boleh memuat turun borang permohonan di portal rasmi BR1M di <https://ebr1m.hasil.gov.my> atau www.treasury.gov.my. Permohonan dalam talian boleh dibuat di portal rasmi BR1M LHDNM, <https://ebr1m.hasil.gov.my>. Permohonan dalam talian hanya boleh dibuat menggunakan komputer dan salinan permohonan perlu disimpan bagi tujuan rekod," katanya. **BH**